

# 目录

<b>1 苏轼</b>	<b>3</b>
浣溪沙·山下兰芽短浸溪	3
水龙吟·似花还似非花	3
满庭芳·蜗角虚名	3
水调歌头·落日绣帘卷	4
水调歌头·明月几时有	4
念奴娇·大江东去	5
西江月·世事一场大梦	5
西江月·三过平山堂下	6
临江仙·一别都门三改火	6
临江仙·夜饮东坡醒复醉	7
鹧鸪天	7
少年游	8
定风波	8
定风波	9
南乡子	9
南乡子	10
望江南 忆江南	10
卜算子	11
卜算子	11
贺新郎	11
洞仙歌	12
江神子 江城子	12
江神子 江城子	13
江神子 江城子	14
江神子 江城子	14
蝶恋花	15
蝶恋花	15
永遇乐	16
行香子	16
行香子	17

<b>2 纳兰性德</b>	<b>17</b>
浣溪沙·身向云山那畔行	17
浣溪沙·已惯天涯莫浪愁	18
浣溪沙·谁道飘零不可怜	18
浣溪沙·残雪凝辉冷画屏	18
摊破浣溪沙·风絮飘残已化萍	19
摊破浣溪沙·葬名花	19
长相思·山一程	19
菩萨蛮·问君何事轻离别	20
菩萨蛮·朔风吹散三更雪	20
菩萨蛮·萧萧几叶风兼雨	20
菩萨蛮·催花未歇花奴鼓	21
菩萨蛮·新寒中酒敲窗雨	21
菩萨蛮·黄云紫塞三千里	21
画堂春·一生一代一双人	21
临江仙·寒柳	22
蝶恋花·又到绿杨曾折处	22
蝶恋花·辛苦最怜天上月	22
蝶恋花·出塞	23

## 1 苏轼

### 浣溪沙·山下兰芽短浸溪

山下兰芽短浸溪。松间沙路净无泥。萧萧暮雨子规啼。  
谁道人生无再少，门前流水尚能西。休将白发唱黄鸡。

### 水龙吟·似花还似非花

似花还似非花，也无人惜从教坠。  
抛家傍路，思量却是，无情有思。  
萦损柔肠，困酣娇眼，欲开还闭。  
梦随风万里，寻郎去处，又还被、莺呼起。  
不恨此花飞尽，恨西园、落红难缀。  
晓来雨过，遗踪何在，一池萍碎。  
春色三分，二分尘土，一分流水。  
细看来，不是杨花点点，是离人泪。

### 满庭芳·蜗角虚名

蜗角虚名，蝇头微利，算来著甚乾忙。  
事皆前定，谁弱又谁强。  
且趁闲身未老，尽放我、些子疏狂。

百年里，浑教是醉，三万六千场。  
思量。  
能几许，忧愁风雨，一半相妨。  
又何须，抵死说短论长。  
幸对清风皓月，苔茵展、云幕高张。  
江南好，千锺美酒，一曲《满庭芳》。

## 水调歌头·落日绣帘卷

落日绣帘卷，亭下水连空。  
知君为我，新作窗户湿青红。  
长记平山堂上，敝枕江南烟雨，渺渺没孤鸿。  
认得醉翁语，山色有无中。  
一千顷，都镜净，倒碧峰。  
忽然浪起，掀舞一叶白头翁。  
堪笑兰台公子，未解庄生天籁，刚道有雌雄。  
一点浩然气，千里快哉风。

## 水调歌头·明月几时有

明月几时有，把酒问青天。

不知天上宫阙，今夕是何年。  
我欲乘风归去，又恐琼楼玉宇，高处不胜寒。  
起舞弄清影，何似在人间。  
转朱阁，低绮户，照无眠。  
不应有恨，何事长向别时圆。  
人有悲欢离合，月有阴晴圆缺，此事古难全。  
但愿人长久，千里共婵娟。

## 念奴娇·大江东去

大江东去，浪淘尽、千古风流人物。  
故垒西边人道是，三国周郎赤壁。  
乱石穿空，惊涛拍岸，卷起千堆雪。  
江山如画，一时多少豪杰。  
遥想公瑾当年，小乔初嫁了，雄姿英发。  
羽扇纶巾谈笑间，强虏灰飞烟灭。  
故国神游，多情应笑，我早生华发。  
人间如梦，一尊还酹江月。

## 西江月·世事一场大梦

世事一场大梦，人生几度秋凉。

夜来风叶已鸣廊。

看取眉头鬓上。

酒贱常愁客少，月明多被云妨。

中秋谁与共孤光。

把盏凄然北望。

## 西江月·三过平山堂下

三过平山堂下，半生弹指声中。

十年不见老仙翁。

壁上龙蛇飞动。

欲吊文章太守，仍歌杨柳春风。

休言万事转头空。

未转头时皆梦。

## 临江仙·一别都门三改火

一别都门三改火，天涯踏尽红尘。

依然一笑作春温。

无波真古井，有节是秋筠。

惆怅孤帆连夜发，送行淡月微云。

尊前不用翠眉颦。

人生如逆旅，我亦是行人。

## 临江仙·夜饮东坡醒复醉

夜饮东坡醒复醉，归来仿佛三更。

家童鼻息已雷鸣。

敲门都不应，倚杖听江声。

长恨此身非我有，何时忘却营营。

夜阑风静縠纹平。

小舟从此逝，江海寄馀生。

## 鹧鸪天

林断山明竹隐墙。

乱蝉衰草小池塘。

翻空白鸟时时见，照水红蕖细细香。

村舍外，古城旁。

杖藜徐步转斜阳。

殷勤昨夜三更雨，又得浮生一日凉。

## 少年游

去年相送，馀杭门外，飞雪似杨花。  
今年春尽，杨花似雪，犹不见还家。  
对酒卷帘邀明月，风露透窗纱。  
恰似姮娥怜双燕，分明照、画梁斜。

## 定风波

莫听穿林打叶声。  
何妨吟啸且徐行。  
竹杖芒鞋轻胜马。  
谁怕。  
一蓑烟雨任平生。  
料峭春风吹酒醒。  
微冷。  
山头斜照却相迎。  
回首向来潇洒处。  
归去。  
也无风雨也无晴。



## 定风波

常羡人间琢玉郎。

天应乞与点酥娘。

尽道清歌传皓齿。

风起。

雪飞炎海变清凉。

万里归来颜愈少。

微笑。

笑时犹带岭梅香。

试问岭南应不好。

却道。

此心安处是吾乡。

## 南乡子

霜降水痕收。

浅碧鳞鳞露远洲。

酒力渐消风力软，飕飕。

破帽多情却恋头。

佳节若为酬。

但把清尊断送秋。

万事到头都是梦，休休。

明日黄花蝶也愁。

## 南乡子

东武望余杭。

云海天涯两杳茫。

何日功成名遂了，还乡。

醉笑陪公三万场。

不用诉离觞。

痛饮从来别有肠。

今夜送归灯火冷，河塘。

堕泪羊公却姓杨。

## 望江南 忆江南

春未老，风细柳斜斜。

试上超然台上望，半壕春水一城花。

烟雨暗千家。

寒食后，酒醒却咨嗟。

休对故人思故国，且将新火试新茶。

诗酒趁年华。

## 卜算子

蜀客到江南，长忆吴山好。  
吴蜀风流自古同，归去应须早。  
还与去年人，共藉西湖草。  
莫惜尊前仔细看，应是容颜老。

## 卜算子

缺月挂疏桐，漏断人初静。  
时见幽人独往来，缥缈孤鸿影。  
惊起却回头，有恨无人省。  
拣尽寒枝不肯栖，寂寞沙洲冷。

## 贺新郎

乳燕飞华屋。  
悄无人、桐阴转午，晚凉新浴。  
手弄生绡白团扇，扇手一时似玉。  
渐困倚、孤眠清熟。

帘外谁来推绣户，枉教人、梦断瑶台曲。

又却是，风敲竹。

石榴半吐红巾蹙。

待浮花、浪蕊都尽，伴君幽独。

浓艳一枝细看取，芳心千重似束。

又恐被、秋风惊绿。

若待得君来向此，花前对酒不忍触。

共粉泪，两簌簌。

## 洞仙歌

冰肌玉骨，自清凉无汗。

水殿风来暗香满。

绣帘开、一点明月窥人，人未寝、欹枕钗横鬓乱。

起来携素手，庭户无声，时见疏星渡河汉。

试问夜如何，夜已三更，金波淡、玉绳低转。

但屈指、西风几时来，又不道、流年暗中偷换。

## 江神子 江城子

凤凰山下雨初晴。

水风清。  
晚霞明。  
一朵芙蕖，开过尚盈盈。  
何处飞来双白鹭，如有意，慕娉婷。  
忽闻江上弄哀筝。  
苦含情，遣谁听。  
烟敛云收，依约是湘灵。  
欲待曲终寻问取，人不见，数峰青。

## 江神子 江城子

老夫聊发少年狂。  
左牵黄。  
右擎苍。  
锦帽貂裘，千骑卷平冈。  
为报倾城随太守，亲射虎，看孙郎。  
酒酣胸胆尚开张。  
鬓微霜。  
又何妨。  
持节云中，何日遣冯唐。  
会挽雕弓如满月，西北望，射天狼。

## 江神子 江城子

天涯流落思无穷。

既相逢。

却匆匆。

携手佳人，和泪折残红。

为问东风馀几许，春纵在，与谁同。

隋堤三月水溶溶。

背归鸿。

去吴中。

回首彭城，清泗与淮通。

寄我相思千点泪，流不到，楚江东。

## 江神子 江城子

十年生死两茫茫。

不思量。

自难忘。

千里孤坟，无处话凄凉。

纵使相逢应不识，尘满面，鬓如霜。

夜来幽梦忽还乡。

小轩窗。

正梳妆。  
相顾无言，惟有泪千行。  
料得年年断肠处，明月夜，短松冈。

## 蝶恋花

花褪残红青杏小。  
燕子飞时，绿水人家绕。  
枝上柳绵吹又少。  
天涯何处无芳草。  
墙里秋千墙外道。  
墙外行人，墙里佳人笑。  
笑渐不闻声渐悄。  
多情却被无情恼。

## 蝶恋花

簌簌无风花自簌。  
寂寞园林，柳老樱桃过。  
落日多情还照坐。  
山青一点横云破。

路尽河回千转舵。  
系缆渔村，月暗孤灯火。  
凭仗飞魂招楚些。  
我思君处君思我。

## 永遇乐

明月如霜，好风如水，清景无限。  
曲港跳鱼，圆荷泻露，寂寞无人见。  
攄如三鼓，铿然一叶，黯黯梦云惊断。  
夜茫茫，重寻无处，觉来小园行遍。  
天涯倦客，山中归路，望断故园心眼。  
燕子楼空，佳人何在，空锁楼中燕。  
古今如梦，何曾梦觉，但有旧欢新怨。  
异时对，黄楼夜景，为余浩叹。

## 行香子

清夜无尘。  
月色如银。  
酒斟时、须满十分。



浮名浮利，虚苦劳神。  
叹隙中驹，石中火，梦中身。  
虽抱文章，开口谁亲。  
且陶陶、乐尽天真。  
几时归去，作个闲人。  
对一张琴，一壶酒，一溪云。

## 行香子

携手江村。  
梅雪飘裙。  
情何限、处处消魂。  
故人不见，旧曲重闻。  
向望湖楼，孤山寺，涌金门。  
寻常行处，题诗千首，绣罗衫、与拂红尘。  
别来相忆，知是何人。  
有湖中月，江边柳，陇头云。

## 2 纳兰性德

### 浣溪沙·身向云山那畔行

身向云山那畔行，北风吹断马嘶声  
深秋远塞若为情  
一抹晚烟荒戍垒，半竿斜日旧关城  
古今幽恨几时平

## 浣溪沙·已惯天涯莫浪愁

已惯天涯莫浪愁，寒云衰草渐成秋  
漫因睡起又登楼  
伴我萧萧惟代马，笑人寂寂有牵牛，劳人只合一生休

## 浣溪沙·谁道飘零不可怜

西郊冯氏园看海棠，因忆《香严词》有感  
谁道飘零不可怜，旧游时节好花天  
断肠人去自经年  
一片晕红才著雨，几丝柔绿乍和烟  
倩魂销尽夕阳前

## 浣溪沙·残雪凝辉冷画屏

残雪凝辉冷画屏，落梅横笛已三更，更无人处月胧明

我是人间惆怅客，知君何事泪纵横，断肠声里忆平生

## 摊破浣溪沙·风絮飘残已化萍

风絮飘残已化萍，泥莲刚倩藕丝萦

珍重别拈香一瓣，记前生

人到情多情转薄，而今真个悔多情

又到断肠回首处，泪偷零

## 摊破浣溪沙·葬名花

林下荒苔道韞家，生怜玉骨委尘沙

愁向风前无处说，数归鸦

半世浮萍随逝水，一宵冷雨葬名花

魂是柳绵吹欲碎，绕天涯

## 长相思·山一程

山一程，水一程，身向榆关那畔行，夜深千帐灯

风一更，雪一更，聒碎乡心梦不成，故园无此声

## 菩萨蛮·问君何事轻离别

问君何事轻离别，一年能几团圆月

杨柳乍如丝

故园春尽时

春归归不得，两桨松花隔

旧事逐寒潮，啼鹃恨未消

## 菩萨蛮·朔风吹散三更雪

朔风吹散三更雪，倩魂犹恋桃花月

梦好莫催醒，由他好处行

无端听画角，枕畔红冰薄

塞马一声嘶，残星拂大旗

## 菩萨蛮·萧萧几叶风兼雨

萧萧几叶风兼雨，离人偏识长更苦

欹枕数秋天，蟾蜍下早弦

夜寒惊被薄，泪与灯花落

无处不伤心，轻尘在玉琴

## 菩萨蛮·催花未歇花奴鼓

催花未歇花奴鼓，酒醒已见残红舞

不忍覆余觞，临风泪数行

粉香看又别，空剩当时月

月也异当时，凄清照鬓丝

## 菩萨蛮·新寒中酒敲窗雨

新寒中酒敲窗雨，残香细袅秋情绪

才道莫伤神，青衫湿一痕

无聊成独卧，弹指韶光过

记得别伊时，桃花柳万丝

## 菩萨蛮·黄云紫塞三千里

黄云紫塞三千里，女墙西畔啼乌起

落日万山寒，萧萧猎马还

笳声听不得，入夜空城黑

秋梦不归家，残灯落碎花

## 画堂春·一生一代一双人

一生一代一双人，争教两处销魂。

相思相望不相亲，天为谁春。

浆向蓝桥易乞，药成碧海难奔。

若容相访饮牛津，相对忘贫。

## 临江仙·寒柳

飞絮飞花何处是，层冰积雪摧残，疏疏一树五更寒

爱他明月好，憔悴也相关

最是繁丝摇落后，转教人忆春山

湔裙梦断续应难

西风多少恨，吹不散眉弯

## 蝶恋花·又到绿杨曾折处

又到绿杨曾折处，不语垂鞭，踏遍清秋路

衰草连天无意绪，雁声远向萧关去

不恨天涯行役苦，只恨西风，吹梦成今古

明日客程还几许，沾衣况是新寒雨

## 蝶恋花·辛苦最怜天上月

辛苦最怜天上月，一夕如环，夕夕都成玦  
若似月轮终皎洁，不辞冰雪为卿热  
无那尘缘容易绝，燕子依然，软踏帘钩说  
唱罢秋坟愁未歇，春丛认取双栖蝶

## 蝶恋花·出塞

今古河山无定据  
画角声中，牧马频来去  
满目荒凉谁可语  
西风吹老丹枫树  
从前幽怨应无数  
铁马金戈，青冢黄昏路  
一往情深深几许  
深山夕照深秋雨